

Dor schwäbische Morga-Blues

(in Styro-Dur oder in Pull-Moll)

Oh isch des früh no heit morga - on dor Hemmel isch grau
I wälz me em Bett - on mei Maga isch flau
Dor Rigga duat mor weh - mei Bauch der isch' z'fett –
Ich mach mor koin Stress on bleib' halt em Bett.

Am sieb'ne wird's hell - on am ach'de no heller
Mei Frau guckt me ohh – Jetzt mach doch mol schnellor
Mensch des Frühstück wird kalt - ond i fühl me so alt
ganz egal – des isch mor alles sowieso no z'bald.

Mei Frau isch scho schaffa - on's Frühstück steht no rom
Die Weckla sen hart - on dor Kaffe isch kalt,
Des Frühstück isch furchtbar - des macht me net oh
egal ond koin Stress, no bleibe halt do.

I guck aus am Fenschdor - draussa isch's grau on au nass
Bei so ma scheiß Weddor - kriagt me koinor uff d'Gass
No bleib-e halt hocka - des juckt doch koi Sau –
Jetzt drenk-e a Bier und wart uff mei Frau.

Bald isches scho mittag - jetzt muss e noh raus
Mei Frau kommt bald hoim - ond noh lacht se me aus
Des isch mor z'viel Stress - I ben doch ihr Moh –
Jetzt gange halt widor ens Bett – on no bleibe halt do.